

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-37-Z/24

Kakanj, 29.02.2024. godine

Z A P I S N I K

**sa 37. vanredne sjednice Općinskog vijeća održane 29.02.2024. godine (četvrtak)
u sali Općinskog vijeća sa početkom u 9:00 sati
(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 37. vanrednu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Mediha Mamela, Džemal Bečirhodžić, Safet Šahman, Nerma Aliefendić, Omer Musić, Namir Talić, Adis Mrkonjić, Amar Selimović, Izudin Hrusto, Elvir Delibašić i Kenan Kozlo (**SDA**)

Vinka Aletović, Miroslav Spasojević i Ahmed Begić (**SDP BiH**)

Sabit Čehajić (**S BiH**)

Dževdet Huskić, Marcela Ravlija i Branko Češljčić (**NS**)

Enver Merdić i Mugdin Gorak (**SBB BiH**)

Armin Bašić i Adnan Čobo (**DF**)

Slaven Katičić (**HDZ BiH**)

Mujo Fafulić - (**nacionalna manjina**)

Zerina Kovač i Fakir Ajdinović (**samostalni vijećnici**)

Odsutni vijećnici: Mejrema Purišević i Alen Josipović (**SDA**), Edin Šljivo (**SDP BiH**) i Mirsad Tursum (**samostalni vijećnik**)

Predsjedavajući je konstatovao da je na sjednici u momentu prijave prisutno 26 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Emir Zaimović, sekretar Općinskog vijeća – po ovlaštenju

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurudin Hrusto, pomoćnik općinskog načelnika za civilnu zaštitu

Mukades Delibašić, pomoćnik općinskog načelnika za imovinskopravne, geodetske poslove i katastar nekretnina

Bahrudin Arnaut, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

Zijad Neimarlija, direktor Zavoda za planiranje i izgradnju općine Kakanj
Mahir Sikira, šef Stručne službe za poslove Općinskog načelnika

Izjescioci, obrađivači, gosti

Elmedin Karić, predstavnik MZ Pope

Azem Husika, predstavnik MZ Kakanj II

Zijad Fazlagić i Alis Avdović, stečajni upravnik i tehnički rukovodilac „Hidrogradnja“ d.d. Sarajevo u stečaju

Predstavnici medija

NTV IC Kakanj

Radio Kakanj

Kakanj-Info

Utvrđivanje dnevnog reda

Predsjedavajući je za 37. vanrednu sjednicu predložio dnevni red po pozivu sa samo jednom tačkom dnevnog reda i to: Zahtjev mještana MZ Kakanj II i MZ Pope za rješavanje problematike pri radu Kamenoloma „Greben“.

Nije bilo diskusije pa je dnevni red usvojen jednoglasno sa 25 glasova ZA.

1. Zahtjev mještana MZ Kakanj II i MZ Pope za rješavanje problematike pri radu Kamenoloma „Greben“

Obrađivači: Savjet MZ Kakanj II i MZ Pope

Izjescioci: Općinski načelnik – Mirnes Bajtarević

Predstavnik MZ Pope – Elmedin Karić

Predstavnik MZ Kakanj II – Azem Husika

Općinski načelnik: je napomenuo da je vanredna sjednica Vijeća zakazana na zahtjev mještana MZ Kakanj II i MZ Pope zbog problema koje isti imaju usljed rada PD „Hidrogradnja“ u stečaju. U zaprimljenom aktu stoji da su aktivnosti Hidrogradnje po pitanju izvođenja radova miniranjem tla u posljednje vrijeme intenzirani što ugrožava sigurnost i zdravlje ljudi. Dalje se navodi da je zbog miniranja ugrožen i rezervoar pitke vode, što sve ukazuje da je evidentna ugroženost stanovništva. O svemu navedenom je upoznata kantonalna inspekcija i nadležno ministarstvo koje izdaje dozvolu za rad Hidrogradnji. Rekao je da očekuje aktivan angažman svih vijećnika, a u cilju usvajanja odgovarajućih zaključaka.

Elmedin Karić: je rekao da mještani imaju probleme od početka rada kamenoloma i da su pretrpili velike štete na objektima, što je i u sudskim postupcima dokazano. Te štete u najvećoj mjeri nisu isplaćene ni u vremenu dok Hidrogradnja nije ušla u stečaj, a sad je nezamislivo da se išta od toga isplati. Međutim, takav ishod sporova, odnosno utvrđena odgovornost Hidrogradnje za štete na objektima je bio razlog zašto se prešlo na eksploataciju bagerima, tako da do početka Covid pandemije nije bilo miniranja. U tom periodu su ponovi izvršili nekoliko miniranja, a na reagovanje mještana su kazali da im je projektom odobreno „rastresanje tla“ svake tri godine. Nakon tog vremena nije bilo miniranja do unazad 2-3 mjeseca kada su počela intenzivnija miniranja i to bez ikakvih najava stanovništvu. Dalje je rekao da se obraćao općinskoj inspekciji koja je prijave prosljedila nadležnoj kantonalnoj inspekciji i svi odgovori se svode na to da Hidrogradnja ima svu potrebnu dokumentaciju za izvođenje radova, ali im ista nikada nije dostavljena. Još je rekao da postoji bojazan da usljed daljeg miniranja nastane šteta na bazenu pitke vode koji napaja vodom tri mjesne zajednice, što bi izazvalo katastrofalne posljedice. Naglasio je da mještani nisu za prestanak rada kamenoloma, ali zahtijevaju isključivo rad bagerom, bez miniranja.

Azem Husika: je ponovio da su problemi za mještane prisutni od početka rada kamenoloma i da su još prije rata donesene presude koje utvrđuju odgovornost Hidrogradnje za štete na objektima, ali većina tih

šteta nikada nije isplaćena. Rekao je da je u periodu 2004-2006. godine postignut dogovor, a postoji i rješenje federalne inspekcije iz 2006. godine, kojim se Hidrogradnji dozvoljava dalja eksploatacija sirovine bagerom. Takvo stanje je ostalo do 2019. godine kada se ponovo počelo sa miniranjem što je natjeralo mještane da izađu na teren i fizički blokiraju dalji rad Hidrogradnje. Tadašnja lokalna vlast je uspjela isposlovati sa Ministrastvom privrede ZDK da se obustave dalja miniranja i da se proizvodnja obavlja isključivo bagerom, što je trajalo do prije 2-3 mjeseca. Zbog promjena u načinu rada su se obratili na više adresa kako bi zaštitili svoju imovinu. Naveo je još da postoji bojazan da bi moglo doći do stvaranja klizišta zbog načina na koji se radi, a također postoji mogućnost da se uđe u stare rudarske radove, što bi za mještane izazvalo mnogo veće probleme. Smatra da je suštinski problem što nema dijaloga između predstavnika mjesnih zajednica i Hidrogradnje, jer oni na sve pokušaje dijaloga zauzimaju stav da su kuće u tom području nelegalno izgrađene, što nije tačno, a uz to posljedice miniranja se manifestuju i na objektima udaljenim gotovo jedan kilometar. U skladu s navedenim oni traže od federalne i kantonalne inspekcije da utvrdi ispunjenost 25 stavki iz Zakona o rudarstvu, odnosno da se ispita da li Kamanelom „Greben“ radi po zakonu. Predložio je da Vijeće usvoji zaključak kojim se obustavlja dalje miniranje u Kamenolomu „Greben“, te da se upute dopisi Ministarstvu privrede ZDK, kantonalnoj i federalnoj inspekciji da se revidiraju sve dozvole za rad koje Hidrogradnja ima.

Zijad Fazlagić: je u svojstvu stečajnog upravnika Hidrogradnje rekao da razumije predstavnike mjesnih zajednica koji imaju svoje argumente i smatra da treba vidjeti šta se može uraditi po pitanju iznesenih zahtjeva, šta je to optimalno. U kontekstu cijele situacije rekao je da treba razlikovati pravno i moralno. Pravno nema ništa nelegalno na strani Hidrogradnje jer imaju sve dozvole i redovno podnose izvještaje na koje nikada nije bilo primjedbi. Što se tiče moralnog aspekta on razumije mještane koji strahuju i zbog minimalnog potresanja. U vezi neisplaćenih šteta je rekao da nije osporio ni jednu, a da će do isplate doći kada proda stečajnu masu i kada budu na redu za isplatu prema Zakonu o stečaju. Rekao je da lično prisustvuje svim miniranjima i da je radi što manjeg nezadovoljstva mještana naložio da se smanje bušotine i količine upotrebljenog eksploziva na 1/3 od projektovanog. Taj metod rada mu značajno povećava troškove, ali na to pristaje isključivo radi mještana. Dalje je rekao da bager kojim se vrši eksploatacija je najveći u BiH, ali da jednostavno nekada se naiđe na tako tvrd materijal da ni taj ogromni bager ne može da vrši otkopavanje. Tada se pristupa rastresanju, za što imaju dozvole, dok za miniranje ne posjeduju dozvole. Ta rastresanja rade svako 2-3 mjeseca, nekad i rjeđe, ali je činjenica da ne postoji druga metoda rada. Nema ništa protiv da se izvrši inspekcijski pregled, ali smatra da ne treba zaboraviti da je Hidrogradnja dosta pozitivnog učinila za predmetne mjesne zajednice, odnosno da su one imale koristi od Hidrogradnje, naročito u infrastrukturnom smislu. Rekao je da su svjesni da je za dobrobit svih potreban kompromis, pa se i ponašaju kompromisno jer žele zadovoljstvo i druge strane. Na kraju je rekao da bi na sjednici veću ulogu trebala imati TC Kakanj obzirom da je ona nosilac prava na koncesiju, a imali bi veliki problem ukoliko bi prestali isporučivati materijal za TC Kakanj, jer je to ugovorna obaveza, te bi morali platiti ogromne štete.

U diskusiji su učestvovali: Dževdet Huskić, Slaven Katičić, Enver Merdić i Adnan Čobo.

Dževdet Huskić: je rekao da je sjednica korisna za sve, te je ocijenio kao korektne zahtjeve predstavnika MZ koji su iskazali spremnost da podnesu žrtvu za opće dobro. Mišljenja je da ne treba potencirati stav „da će neko prestati sa radom“, jer to nije cilj nikome, što su iskazali predstavnici MZ, kao i što ne bi trebalo spominjati benefite koje su mještani dobili od Hidrogradnje, jer se stiče dojam da bi sada zbog toga trebali trpiti štetu na svojoj imovini.

Slaven Katičić: je rekao da je legitimno da su ljudi zabrinuti za svoju imovinu jer je evidentno da nastaje šteta na njoj, pa bi trebalo iznaći rješenje kako taj problem riješiti. Mišljenja je da je miniranje i rastresanje tla jedno te isto, te je podsjetio na dopunski rudarski projekat iz 2007. godine gdje se odobrava eksploatacija sirovine uz upotrebu bagera, a što se vidi iz jednog od dokumenata u materijalu. Ustvrdio je da kad se priča o štetama treba biti svjestan da su one utvrđene sudom i da to nema mogućnost bilo ko da osporava, ali sumnja da će iste ikada biti isplaćene mještanima. Konstatovao je da obe strane priznaju da nije bilo komunikacije, koju smatra neophodnom i koju treba pojačati. Naglasio je da je obaveza Vijeća da stane iza svojih građana, te da ne treba dovoditi Vijeća u situaciju da preispituje svoje ranije date saglasnosti na koncesiju, jer je svjesno značaja Kamenoloma za TC Kakanj. Suština je da se želi biti dobar domaćin i imati dobre odnose sa svima koji rade u Kaknju. Konstataciju da je Hidrogradnja učinila dobre stvari za mještane je ocijenio logičnom i normalnom jer su tu ljudi živjeli vijekovima prije

dolaska Hidrogradnje, te je ista prije početka svoga rada morala otkupiti zemlju od mještana. Pozvao je na kraju da se pokušaju usaglasiti zaključci koji će u najvećoj mjeri zadovoljiti sve zainteresovane strane.

Enver Merdić: je istakao da Vijeće nije protiv rada Kamenoloma, te da u ovu priču ne bi trebalo uvlačiti TC Kakanj, jer Vijeće ne interesuju međosobni odnosi Hidrogradnje i Cementare. Rekao je da je logično da Vijeće stane iza zahtjeva mještana, te je predložio da se insistira na utvrđivanju postojanja okolinske dozvole za rad Kamenoloma, obzirom da se javljaju velika buka i vibracija. Istom bi trebali biti navedeni svi uslovi za vršenje eksploatacije, što i jeste sadržaj zahtjeva mještana.

Elmedin Karić: smatra da bi bilo poželjno i dobro da se u rješavanje problematike uključi i TC Kakanj. Ne prihvata priču da se u prvi plan stavlja pitanje šta će se desiti sa Hidrogradnjom ili Cementarom, jer bi u prvi plan trebalo staviti ljude koji na tom prostoru žive vijekovima. Mišljenja je da se ne može odobriti proširenje eksploatacionog polja ukoliko je firma u stečaju, pa je u tom smislu upitna regularnost rada Kamenoloma. Slaže se da je potreban kompromis i predlaže da se nastavi eksploatacija sirovine, ali da se za tu svrhu nabavi moderniji i veći bager koji će zadovoljiti potrebe Hidrogradnje bez da se vrše miniranja. Pozvao je na poštivanje pravnih i moralnih principa, te je istakao da se jasno protivi principu da se odluke o Kakanju i Kakanjcima donose u Sarajevu.

Alis Avdović: je kao tehnički rukovodilac u Hidrogradnji pojasnio nekoliko tehničkih stvari o kojima je bilo diskusije. Rekao je da se svi radovi u kamenolomu izvode na osnovu rudarskog projekta koji je revidiran od strane Ministarstva za privredu ZDK, odnosno dopunskog rudarskog projekta koji je nastavak glavnog rudarskog projekta sa promjenama koje su izvršene, a koje se ne odnose na miniranje. Pojasnio je da u rudarstvu postoje dvije vrste miniranja (na odbacivanje i na rastresanje), a da se u Kamenolomu „Geben“ primjenjuje princip rastresanja koji je do detalja razrađen dopunskim rudarskim projektom. U vezi diskusije oko ugroženosti bazena za vodu je rekao da je sa predstavnicima Vodokoma obišao teren i da je utvrđeno da se bazen nalazi na udaljenosti 150-200 metara iza mjernog mjesta broj 2, što znači da na mjestu gdje se nalazi bazen nikada nije zabilježen potres. Rekao je da su sva posljednja miniranja obavljena daleko ispod granica dozvoljenih vrijednosti, a mjerenja su vršena od strane nezavisne kuće, koji rezultati su dostavljeni inspektoratu. U tom smislu je pojasnio da, po evropskim standardima, štete prilikom miniranja na stambenim objektima mogu izazvati potresi od 5 mm/s, dok potresi od 3 mm/s mogu izazvati štete na istorijskim spomenicima, dok je najveći potres prilikom posljednjih miniranja u Kamenolomu zabilježen u vrijednosti od 2,13 mm/s. U vezi sumnje za nastanak klizišta je rekao da nije moguće da se to desi iz razloga što se svakih 6 mjeseci radi projekat sigurnosti radnih-završnih kosina, kojeg radi firma iz Tuzle i koji je zadovoljavajući. Rekao je da su vršena bušenja do 20 metara dubine i da nisu primjećeni tragovi rudarskih radova. Dalje je rekao da se vrši najavljuvanje miniranja nadležnim organima, jer suprotno postupanje povlači krivičnu odgovornost odgovorne osobe, te je rekao da je netačan navod da se izašlo van eksploatacionog polja obzirom da se redovno vrše mjerenja i podaci dostavljaju inspektoratu.

Slaven Katičić: je rekao da ima nekoliko dilema nakon izlaganja predstavnika Hidrogradnje. Naime, u meterijalima za sjednicu koje su pripremili predstavnici mjesnih zajednica nalazi se Obavijest potpisana od ministra privrede ZDK kojom se odobrava Hidrogradnji nastavak radova na osnovu dopunskog rudarskog projekta uz naznaku „uz korištenje bagera Demag“. Na osnovu navedenog dokumenta je evidentno da se odobrava rad u Kamenolomu, ali uz upotrebu bagera, te se također konstatuje da u periodu 2007-2019. godine nije bilo uznemiravanja građana. Uz to se u Obavijesti navodi da se nastavaka radova obavlja na prednje navedeni način kako se ne bi ugrožavalo lokalno stanovništvo. Još se osvrnuo na navode da nisu primjećeni tragovi starih rudarskih radova i rekao da je vrlo upitno iznošenje takve tvrdnje.

Adnan Čobo: je rekao da Vijeće ne bi trebalo imati dilema po ovom pitanju, odnosno da se trebaju donijeti jednostavni zaključci. Prvi bi trebao biti da se ubuduće ne može vršiti miniranje u Kamenolomu „Geben“, a drugi da se dinamika eventualnog nastavka radova treba usaglasiti na sastanku užeg kruga ljudi (Kolegij, predstavnici MZ i predstavnici Hidrogradnje). Još je rekao da se iz izlaganja predstavnika Hidrogradnje može zaključiti da nisu Kakanjci, jer po pitanju predmetne materije nemaju osjećaje kao domaće stanovništvo. Smatra da do isplate ranijih šteta, nastalih prije proglašenja stečaja, neće doći, obzirom da firma ima dug i po osnovu zaostalih obaveza prema svojim radnicima u visini oko 30 miliona KM, a samo proglašenje stečaja znači da je firma gotovo propala. Rekao je da stečajni upravnik nije na listi stečajnih upravnika i da je premašio zakonske godine starosti za obavljanje tog posla.

Alis Avdović: je pojasnio diskusiju u vezi starih rudarskih radova i rekao da ne tvrdi da tih radova nema na prostoru Kamenoloma, ali da na dubinama na kojima su vršena istraživanja za njihove potrebe, nisu pronađeni tragovi bilo kakvih jama.

Općinski načelnik: je predložio da se usvoje određeni zaključci na bazi iznesene diskusije. Predložio je četiri zaključka i to:

1. Općinsko vijeće daje punu podršku zahtjevima građana, te mjesnih zajednica Kakanj II i Pope za hitnu obustavu miniranja u Kamenlomu „Geben“ od strane privrednog društva Hidrogradnja d.d. Sarajevo u stečaju, te reviziju svih dozvola, projekata i druge dokumentacije koja se odnosi na eksploataciju sirovine i privredne aktivnosti Hidrogradnje u Kamenlomu „Geben“ Kakanj.
2. Zadužuju se općinski načelnik i nadležna općinska služba da se obrate Ministarstvu privrede ZDK zahtjevom za reviziju i dostavu relevantne dokumentacije koja se odnosi na koncesione aktivnosti, eksploataciju sirovine i izvođenje radova miniranja tla od strane Hidrogradnja d.d. Sarajevo u stečaju u Kamenlomu „Geben“ Kakanj.
3. Zadužuju se općinski načelnik i nadležna općinska služba da Općinskom vijeću dostave informaciju i svu relevantnu dokumentaciju koja se odnosi na koncesiju i eksploataciju sirovine i izvođenje radova od strane privrednog društva Hidrogradnja d.d. Sarajevo u stečaju u Kamenlomu „Geben“.
4. Zadužuju se općinski načelnik i nadležna općinska služba da se pismeno obrate Kantonalnoj upravi za inspekcijske poslove ZDK u vezi utvrđivanja zakonitosti rada i posjedovanja relevantne dokumentacije od strane privrednog društva Hidrogradnja d.d. Sarajevo u stečaju, poslovna jedinica Kamenolom „Geben“ Kakanj.

Zijad Fazlagić: je napomenuo da ima veliko rukovodno iskustvo jer je preko 35 godina direktor velikih privrednih društava, uz to je predsjednik uduženja stečajnih upravnika, te je rekao da je istina da nije na listi stečajnih upravnika, ali da ga je sud postavio (zadržao) na toj poziciji bez obzira na zakonska ograničenja zbog starosti. Pozvao je Vijeće da donese zakonite i pravno provodive zaključke kako bi on bio oslobođen odgovornosti, a u vezi organizovanja sastanaka i dogovora sa mještanima je rekao da je spreman na svaku saradnju uz maksimalno uvažavanje mještana, ali nije saglasan s tim da se Hidrogradnji stavlja na teret nešto što je pravno dozvoljeno.

Azem Husika: je rekao da je pokušao kod Federalnog ministarstva okoliša pronaći okolinsku dozvolu za Kamenolom „Geben“, ali to nije uspio, pa je u tom smislu predložio da se zaključkom zaduže općinski načelnik i nadležna služba da se pismeno obrate Federalnom ministarstvu okoliša i turizma sa zahtjevom za dostavu okolinske dozvole izdate privrednom društvu Hidrogradnja d.d. Sarajevo u stečaju, za radove u Kamenlomu „Geben“ Kakanj.

Nakon diskusije Vijeće je jednoglasno sa 25 glasova ZA usvojilo sljedeće Zaključke:

1. Općinsko vijeće daje punu podršku zahtjevima građana, te mjesnih zajednica Kakanj II i Pope za hitnu obustavu miniranja u Kamenlomu „Geben“ od strane privrednog društva Hidrogradnja d.d. Sarajevo u stečaju, te reviziju svih dozvola, projekata i druge dokumentacije koja se odnosi na eksploataciju sirovine i privredne aktivnosti Hidrogradnje u Kamenlomu „Geben“ Kakanj.
2. Zadužuju se općinski načelnik i nadležna općinska služba da se obrate Ministarstvu privrede ZDK zahtjevom za reviziju i dostavu relevantne dokumentacije koja se odnosi na koncesione aktivnosti, eksploataciju sirovine i izvođenje radova miniranja tla od strane Hidrogradnja d.d. Sarajevo u stečaju u Kamenlomu „Geben“ Kakanj.
3. Zadužuju se općinski načelnik i nadležna općinska služba da Općinskom vijeću dostave informaciju i svu relevantnu dokumentaciju koja se odnosi na koncesiju i eksploataciju sirovine i izvođenje radova od strane privrednog društva Hidrogradnja d.d. Sarajevo u stečaju u Kamenlomu „Geben“.
4. Zadužuju se općinski načelnik i nadležna općinska služba da se pismeno obrate Kantonalnoj upravi za inspekcijske poslove ZDK u vezi utvrđivanja zakonitosti rada i posjedovanja relevantne dokumentacije od strane privrednog društva Hidrogradnja d.d. Sarajevo u stečaju, poslovna jedinica Kamenolom „Geben“ Kakanj.
5. Zadužuju se općinski načelnik i nadležna općinska služba da se pismeno obrate Federalnom ministarstvu okoliša i turizma sa zahtjevom za dostavu okolinske dozvole izdate privrednom društvu Hidrogradnja d.d. Sarajevo u stečaju, za radove u Kamenlomu „Geben“ Kakanj.

Predsjedavajući je zaključio rad 37. vanredne sjednice Općinskog vijeća u 10:50 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
-po ovlaštenju-
Emir Zaimović

**PREDSJEDAVAJUĆI
OPĆINSKOG VIJEĆA**
Slaven Katičić